

مکرمہ فیہ الدیال

❁ ادبی و سیاسی رسالہ اسبوعیہ در ❁

۳۱ نجی سنہ

جلد : ۱۴ - جزو : ۱۴۷ ❁ پنجشنبہ ❁ ۶ جمادی الاخری ۱۳۳۰

سن ازدواج

مصر لیلرله مناسبانه گیرشدکن صکره قدیم یونان حکمراسی سن ازدواجی تعیین ایدر قانونلر وضعنه باشلادیلر . آئینه لیلرلر ایئت واضح قوانینی اولان سولون « اولاد وطنک تربیه سی حقوق حکومتدندر . » اساسنی اسپارٹا قوانینندن اقتباساً قبول و تطبیق ایلشیدی . چونکه (لیکورگس) اسپارٹهده هر مولودی ارضاع ، اطاشه ، تربیه ، تعلیم حکومت ، عائد اولدیغنی و وندنه ناک وظیفه سی مملکته کوچلی قوتلی ، یعنی زور آور عسکر اوله بیله چک اولاد یتشدیرمکن عبارت اوله رق ، بووظیفه یی حقیله ایقایه موفق اولان برقادین (بنت وطن) وصف الیسنه کسب لیاقت ایدمچکنی اساس فضیلت طانتدیرمش ایدی .

ذاتاً اسپارٹهده نکاح معروف ایله ازدواج یوقدی . یالکگز سن اجتماع واردی . آتی ده حکومت قانون ایله تعیین ایتشدی . عموم بنون مملکت ، عموم بنات مملکته

هم فراش اولور ، و بعد قضای و طر ایشنه کیدردی . شو قدر ، که بر ارککک
فراشه داخل اولان بر قز اماره حملک ظهورینه قدر شخص آخرله هم فراش
اولمقدن ممنوع ایدی .

ارکککرده سن اجتماع ۲۰ ، قزلرده ۱۷ یاشرلی ایدی . بر اسپارته دلی قانلیسی
یگر می یا شنده بر قهرمان و اون یدی یا شنده بر اسپارته قزی ایسه هر بر قهرمان
ایله مصارعه اجتماعیه بولنه بیله جک بر پهلوان فتان ایدی .

ایشته بویله تام الصحه ، یعنی خواص صحت و عافیتی و اوصاف تندرستی
وصلاتی خاثر ایکی وجودک محصولی اولان بر مولود ایلروده مدافع وطن
اوله جق اردولری تشکیل ایتک اوزره حکومتک ایدی تربیه سنه تسلیم اولنوردی .
دها یوریمکه باشلار باشلاماز زور آورلککک اگ ادنا مرتبه سندن ، مثلاً یازین
صحباق قوملره گومولمک ، قیشین قارلی ، بوزلی جامورلره بولانق کبی افعال
متضاده دن باشلایه رق طاقت فرسا حالانک کافه سی مولودک سنبله برابر موقع تطبیقه
قونیردی .

اسپارته احوال اجتماعیه و عسکریه سندن خبر ورن آماره نظر آیدی یا شنده
قدر انواع عملیات شاقه ایله اشغال ایدیلان اطفالک یوزده آلتیش بشی مقاومت مشاقه
کسب استحقاتی ایدردی . آندن صکره حر و بردن و هردلو مرض و درد دن
برواسز یشار و دشمن متعرضه قارشی شیرانه بر صولتله ابراز مردانکی ایلردی .
سولون ، آینه یلیری دخی اسپارته لیلره بگزمک آرزو ایتش ایسه ده لیکورکده .
کی متانت عزیمی خاثر اولمدیغندن یالگنز (برنسیپی - اساسی) قبول ایتش
و چونکه آینه ده اسپارته ده کی قاعده اجتماعه بدل اصول نکاح مرعی و هر قارینک
قوجه سی بللی اولدیغندن . اطفالک اسپارته اصولنه موافق صورتده تربیه اولنوب
اولمدیغنی ییلنک اوزره حکومت ، حق تفتیشی خاثر بولنش ایدی .

حال بوکه بر قانونک یالگنز نظریاتی قبول و اقسام عملیه سندن اهل و عدول دن
هیچ بر ثمره مأمول اوله ماز .

آینه ده ایسه شخصه اهمیت و بر یلیردی . تعبیر آخرله (آدم) وصفنه صالح

آدم يتشديرمك مولودی نظر اعتباره آلمغه دكل ، تربيه عمليه وجود ويرمكه متوقف اولديني حالده آئينده تربيه اطفال اسپارتهيه نسبتله حد اعتدالده اجرا اولنوردی . بونكده سببي هر والده ، مولودك كندی ولدی اولديغنه قانع بولمسی ایدی . اسپارتهده ايسه عقب توليدده مولود - دها يوزینی كورمندن ، حتی نوعيتندن بييله خبری اولمندن - والدهدن نزع اولنوردی . چونكه حكومت مولود ايچون معين بر پدر طانيمديني جهته والدهنك دخي هوتی معتبر دكلدی . عموم اطفاله اولاد مملكت نامی ويريليردی .

آئينه نسوانی ، چوجقلىرينك اسپارته اطفالی يولنده تربيه اولملىينه آرزو كوسترمليله اسپارتهدن دايه لر جلب ايدرلر و چوجقلى آئرلك ایدی اهتمامه توديع ايدرلردی . فقط هر دايه دست تربيته توديع اولنان چوجفی بالطبع كندی بيلديكندن زياده ، والده سنك شفقت و محبتنه لايق بر صورتده تربيه ايدردي . بصورت تربيه نك حد غايه سی اطفالك بدنحي سال حياتی ایدی . یدی ياشنی اكمل ایدن بر چوجغه اسرادن بری لالا تعيين ايديلير . چوجق اويقو وقتنه ، يعنی خوابگاهنه كيرنجيه قدر لالاسيله برلكده بولنوردی . مكتهنه آنكله كيدردی . اويون يرلرنده ينه لالا رفاقت ايدردي . خادم چوجقله چوجق اولوردی . فقط مخدوم بيوكله بيوك ، يعنی آدم اوله مازدی . چوجق اون ياشنه كلنجه حماسه متعلق ، تاريخی نشيده لر ، شريقلر تعليم ايديلير . اون ايكي ياشنده (هاربه) دينلان آلت موسيقيه چالغنه باشلاردی . اون اوچ ياشنده (ژيمناس) و ويريلير . اون سكز ياشنه قدر اوراده قاير . هر درلو ژيمناستيق ، يعنی تربيه بدنيه يني تعلم ايله زور آورلكده كسب رسوخ ايتمنه اهتمام اولنوردی . ژيمناس تحصيلنی اكملدن صكره ياپديرينك آرزوسی و يا چوجقك ميل طبيعي و استعداد شخصيسي نظر اعتباره آلتهرق حرف و صنايعدن هانكيسي مطلوب ايسه اق صنعته ويريليردی . ايكي سنده بو صنعتی تحصيل ايدرک يگرمنجي سال حياتنده تربيه عليه و عمليه سي ختام بولور و آندن صكره افراد مملكتدن عد اولتهرق خدمت عسكريه ايله مكلف طوتيلوردی .

اسیارتہدہ ایسہ تعلیم علوم یوق ایدی . اورادہ ازالہٴ جہل ایچون متخذ اولان اصول تعلیم حروف وعلوم دکلدی . آنجق مشاق کونا کون حیاتیہ مردانہ عرض سینہٴ مقاومت و موانع براندازلقده ابراز قدرت ایدی . آنک ایچون بر آوج اسپارطلی دنیایہ غلبہ ایتک لیباقتنی حازر اولدیغنه معتقد ایدی . نتہ کم اولہ ایدی .

آینہدہ ظرافت ، بدایع نفیسہ بہ مفتونیت ایکنجی برطبیعت حکمنی بولش و ہلہ طائفۃٴ نسّا مفظور اولدقلمری ملاحتی برطاقم صنّاعی و عملی وسائل ایلہ تزئید و ادامہدن بشقہ برشی ایلہ اشتغال ایتدکلرندن ، مزیتلری ، کندیلرینی ارککلرک بکنہ بیلہ جکی بر بازیمچہ اشتہا حالنہ افراغ ایدشلرندن عبارت قالمشدی . بوجہتلہ آینہدہ تدنیٰ اخلاق کتدجکہ افزایش بولدیغندن نسوانک بو حالی رجالہدہ سرایت ایتمش و بناءً علیہ دمبدم تناسق ایدن خواص رجولیت آینہ لیلری معنی نسویتہ قلب ایلشد .

سولوندن صکرہ سقراط و افلاطون ایلہ آرسطالیس تربیہٴ علمیہ و عملیہ بی نظر اعتبارہ آلمشدر ایسہدہ آینہ لیلری نسوان پسندانہ حالاتدن و نمایلات ظرافت پرستانہدن قور تازہ مامشاردر .

آرسطالیس ، حیات معنویہٴ نک حسن تموی ، حیات مادیہٴ نک انتظام نمونہ تابع اولدیغنی نظر مطالعہ بہ آلہرق حیات معنویہ تعبیر ایتدیکی روحدن اؤل آنک ظریفی اولان بدنک تقویہ سنی انتاج ایدہ جک اسبابک استکمالانی اساس تربیہ عد ایتمش و آنک حصونہٴ حصر مساعی ایدلمسنی توصیه ایلشد .

آرسطالیسک ، نوعین ایچون تخصیص ایتدیکی سن ازدواجده واحد قبایسی نہدر بیلنمہن . چونکہ نسواندہ ۱۷ ورجالہدہ ۳۶ یاشلرینی سن ازدواج اولہرق توصیه ایدر . بردہ قیش موسمدمہ کی ازدواجی موسم صیفیدہ کی ازدواجہ مرجح عد ایلر .

احتمال آرسطالیس بوقاعدہ سنی وضعده یونانستانک طبیعت اقلیمیہ سنی نظر اعتبارہ آلمشدر . یونانستان و تخصیص آینہ اقلیم معتدلہدن شمار اولنمہ جق قدر

صیحاقد ر . بلاد حاتمده ایسه نسوان يك چابوق نشو و نما بولور ، و آن طراوت جوانیلری دخی سائر خواصیله برابر انقراضه باشلار . رجال ایسه دهامقاوم بر قوه مادیه و معنویه یی حائر اولدقلرندن آنرده عهد جوانی نسوانه نسبتله دهامتمد وایکی قاندر . بناء علیه ۳۶ یاشنده کی برار ککک ۱۷ یاشنده بر قزله ازدواج واجتماعندن حاصل اوله جق اولادک اق اقلیمه کوره خواص لازمه تندرستی یی حائر اولسی محتملاتند ر . وشبهه یوقدرکه آرسطالیس کی بر حکیم بونی نتیجه تجارب اوله رق تخصیص وایان ایلشدر .

§

بوگون اوروپا اقوام متمدنه سنده سن ازدواج يك متفاوت ، و بونکله برابر متشتت بر حاله در . اکثر احوالده محافظه کار اولان انگلیزلرده بیله سن ازدواج ، متعارف و مرعی اولان قاعده دن آیرلشدر .

کچن اون طقوزنجی عصرک ربیع اخیرینه قدر غران بریتانیاده علی الاکثر رجال ۲۵ و نسوان ۱۹ ایله یگر می آرمسنده ازدواج ایدرلر ایدی . مؤخرآ بوقاعده یه رعایت فکری زائل اولمش ؛ بوگون اون آلتی ، اون یدی یاشنده کی قزله اوتوز بش ، قرق یاشلرنده کی ارککلرله و ۳۵ قرق یاشلرنده کی قادیلر ، یگر می ، ۲۵ یاشنده کنجزلرله اولتمکده درلر .

فرانسه ده ایسه قانوناً سن ازدواج نسوانده ۲۰ و رجالده ۲۵ اولدینی حالده اون بش ، اون آلتی یاشنده کی قزله اون یدی ۱۸ یاشنده کی دلی قانلیله ترویج ایدلمکده در . بوسبیلهدرکه تشکلات بدنیجه فرانسه خلقی يك بیوک برتنی به دوشمشدر . اولاد وطن عادتا (کوچولمش) در .

اسویجره ایله آلمانیا ده قانونی بر سن ازدواج یوقسه ده صرف وعادت بوایکی مملکتده حسن محافظه ایدلیدیکندن قزله اکثریت اوزره ۱۸ زه کلینجه ترویج ایدلر . وارککلرده یگر می بشی آشیرمز . دفته شایاندرکه آلمانیا ایله اسویجره ده کی

(کوربوز) اولاده اوروپانك بر بلده سنده تصادف ایدیلده من . واقعا مالك شمالیه نك
تمو اعضا به قارشى اولان حسن تأثیرى ده شایان دقت خصوصات طبیعیه دندر .
وقتیه عثمانیلر ده موسم ازدواج نوعین معین ایدی . قزلر ۱۸ ایله ۲۰
یاشلری آر سنده قوجه به ویریلردی . ارکک اولاده ۲۵ دن اول اولدیرلمزدی .
بالطبع متناسب اولان بوتنا کندن حاصل اوله جق اولاد دخی سالم برو جودی
حازر بولنوردی .

ثانیاً اقوام جبلیه نسوانیه وقوعه گلان ازدواجلر دخی اطفال اوزرنده
بیوک بر تأثیر اجرا ایدر . یقین وقتیه قدر والده لر من (چرکس) نسوانندن
انتخاب اولنوردی . شمعی ایسه (قورو آزمان) یعنی متخالف ایکی عرق آر سنده کی
ازدواجلر آزالدیقندن ، باخصوص استانبولده کفو آرامق خاطر یچون اقربا
آر سنده انحصار ایلدیکندن چو جق لر من جلزلا شدی . خاصه قز چو جق لر من
مستعد امراض بر نخافت ایله مفلور بولمقده در . اصول تربیه من . هله تربیه .
بدنیه ده کی غفلتمز دخی بر چوق بلایا تولید ایتدیکندن و بونلرک اڭ مهلکی (ورم)
دینلان آفت اولدیقندن نسل حاضر ، من کل الوجوه محکوم انقراضدر . واقعا
بزم کی اخلاقاً انقراضه دو شمش اولان بر قومک ماده منقرض اولمقغه ده اق قدر
آجینق لازم کلز .

انکلتزه حکما سندن فیلسوف مشهور (لوق) غریب بر قاعده وضع ایلشدر .
برو قتلر بو قاعده انکلتزه ده عصر لرجه مرعی طو تلیش ایمش . حالاده بعض بلادند
رعایت اولمقغه ایمش . قاعده شودر :

هرهانیکی سنده اولور سه اولسون اولنه جک بر ارکک ، سننک نصفنه یدی
عددی ضمیمه ایدرک حاصل یکونیه مساوی سنه مالک بر قادیله ازدواج ایتلیدر .
مثلا ۲۴ یاشنده بر ارککک نصف سنی ۱۲ در . بوگا ۷ عددی ضمیمه ایدنجه حاصل
جمع ۱۹ ایدم جکندن ۱۹ یاشنده بر قزله اولمیلیدر . کذا ۴۰ یاشنده اولنک
ایستیان بر ارکک سننک نصفنه ۷ ضمیمه ایدنجه آله جنی قادی ۲۷ یاشنده اولمق
لازم کلور .

۶۰ یاشننده کی برارک ایچون اوتوز و تمش یاشننده کی برارک ایچون ۴۲ یاشنده بر قادیل ایلل ازدواج اقتضا ایدریور، که نسوانک علی الاکثر منتهای فیض تناسلی بویاشلرده در .

مملکتته قوی البنیه ، قوی الروح ، قوی الذهن ، قوی المحاکمه ، اولاد یتشدیر مک ایچون سن ازدواجی بر قانون معقوله تابع قیلق واجبات اموردندر .

صاغلام بروجوده مالک اولان صاغلام بر روحی حاز اولور . صاغلام بر روحه مالک اولان صاغلام دوشنن برینی حاز اولور . صاغلام دوشنن برینی حاز بر آدمکده محاکمه سی متین و سالم اولور . بوضورتله وطن اوصاف لازمه مادیه و معنویه بی حاز اولاد صاحبی اولمش اولور .

ابوالضیا

